

आकाशवाणी जयपुर-अजमेर  
प्रादेशिक समाचार

- प्रधानमंत्री नरेन्द्र मोदी काल प्रदेश रा दौरा सारु पधारेला- जोधपुर मांय विकास री न्यारी-न्यारी परियोजनावां री नींव रखण अर जनता ने संपण रो कार्यक्रम।
- केंद्रीय मंत्रिमंडल प्रधानमंत्री उज्ज्वला योजना रो फायदो लेवण वाळां सारु रसोई गैस सब्सिडी, दो सौ रुप्या ऊं बधा र तीन सौ रुप्या प्रति सिलेंडर करण री मंजूरी दीनी।
- निर्वाचन विभाग संक्षिप्त पुनरीक्षण पाछे वोटर लिस्टां छापी-वोट देवण वाळां री तादाद बध र 5 करोड़ 26 लाख ने पार कीनी।

अर

- जयपुर मांय आज सुशासन रा बारा मांय दो दिन रो क्षेत्रीय सम्मेलन सरु व्हयो।

000

प्रधानमंत्री नरेन्द्र मोदी रो काल जोधपुर मांय विकास री न्यारी-न्यारी परियोजनावां री नींव रखण अर पूरा व्ह्या काम जनता ने संपण रो कार्यक्रम है। प्रधानमंत्री कोई पांच हजार करोड़ रुप्या रा खर्च वाळी जोधपुर रा अखिल भारतीय आयुर्विज्ञान संस्थान-एम्स मांय साढे तीन सौ बिस्तरां वाळा ट्रॉमा सेंटर अर गहन देखभाल ब्लॉक री नींव रखेला। प्रधानमंत्री रो जोधपुर हवाई अड्डा माथे नुवा टर्मिनल भवन री नींव रखण रो ई कार्यक्रम है। ओ कोई 24 हजार वर्ग मीटर हलका मांय बणायो जावेला, जिण माथे कोई 480 करोड़ रुप्या रो खर्च आवेला। नुवा टर्मिनल भवन ऊं कोई अढाई हजार मुसाफिरां ने सेवा मिल सकेला। प्रधानमंत्री आईआईटी जोधपुर रो परिसर ई जनता ने संपेला। ई काम माथे 1 हजार 135 करोड़ रुप्या ऊं बत्तो खर्च आयो है। राजस्थान केंद्रीय विश्वविद्यालय मांय केंद्रीय पुस्तकालय अर छात्रावास भवन बणावण रा काम री नींव ई रखेला। प्रधानमंत्री कोई 1 हजार 475 करोड़ रुप्या रा खर्च वाळी न्यारी-न्यारी सड़क परियोजनावां री ई सरुआत करेला। ई सागे ई प्रधानमंत्री दो नुवी रेलगाडियां ने ई हरी झंडी बता र रवाना करेला। आं मांय जैसलमेर-दिल्ली बीचे रूणीचा एक्सप्रेस अर मारवाड जंक्शन-कामली घाट बीचे धरोहर रेलगाडी शामिल है। धरोहर रेलगाडी ऊं राज्य मांय सैर-सपाटा ने बधावो मिलेला अर नौकरी-धंधा रा नुवा मौका बणेला। ई रे अलावा प्रधानमंत्री दोवडी बणायी ज्यी 145 किलोमीटर लंबी डेगाना-राई का बाग अर 58 किलोमीटर लंबी डेगाना-कुचामन सिटी रेल लाइन ने जनता ने संपेला। प्रधानमंत्री रो जोधपुर मांय जनसभा ने सम्बोधित करण रो ई कार्यक्रम है।

000

केंद्र सरकार प्रधानमंत्री उज्ज्वला योजना रो फायदो लेवण वाळां सारु रसोई गैस री टंकी बाबत् मिलण वाळी सब्सिडी 200 ऊं बधा र 300 रुप्या कर दीनी है। केंद्रीय मंत्रिमंडल री मीटिंग पाछे सूचना अर प्रसारण मंत्री अनुराग ठाकुर आ जाणकारी दीनी।

000

मंत्री ठाकुर बतायो के मंत्रिमंडल तेलंगाना अर आंध्र प्रदेश बीचे फैसला सारु अंतर-राज्य नदी जल विवाद कानून, 1956 रा तैत कृष्णा जल विवाद न्यायाधिकरण-द्वितीय रा संदर्भ री शर्ता ने ई मंजूरी दे दीनी। ठाकुर बतायो के तेलंगाना मांय सम्मक्का सरक्का केंद्रीय जनजातीय विश्वविद्यालय खोलण सारु केंद्रीय विश्वविद्यालय कानून, 2009 मांय बदलाव ने ई मंजूरी दे दीरीजी है।

000

भारतीय जनता पार्टी रा राष्ट्रीय अध्यक्ष जे पी नड्डा आज जयपुर मांय प्रदेश भाजपा रा 'आपणो राजस्थान, सुझाव आपका संकल्प हमारा' अभियान री सरुआत कीनी। ई अभियान रा तहत भाजपा आवता चुनाव सारु जारी कर्या जावण वाळा संकल्प पत्रां बाबत् जनता री राय लेवेला। नड्डा

आज ई अभियान रा रथां ने हरी झंडी बता र रवाना कीना। ई मौके नड्डा कह्यो के जनता री राय ऊं बणबा वाळा संकल्प पत्र दस्तावेज ही नहीं बल्कि लक्ष्य व्हेला, ज्यां ने पूरा करना व्हेला। वे धारा 370 हटावण समेत केंद्र सरकार रा न्यारा-न्यारा फैसलां रो जिक करता थकां वे कह्यो के भाजपा जो कह्यो वो पूरो कीनो। राज्य सरकार रा मिशन 2030 रो जिक करता थका नड्डा कह्यो के साल 2030 ऊं पैली 2023 आवे है।

000

केंद्रीय मंत्री कृष्ण पाल गुर्जर भारतीय जनता पार्टी की सवाईमाधोपुर विधानसभा हलका री संगठनात्मक बैठक ने आज संबोधित कीना। ई मौके वे आवता विधानसभा चुनाव मांय राज्य री कांग्रेस सरकार री नाकामयाबियां अर प्रधानमंत्री नरेंद्र मोदी री अगुवाई मांय केंद्र सरकार कानी ऊं चलायी जा रही जनता रा भला री न्यारी-न्यारी योजनावां री जानकारी जनता ने देवण बाबत कह्यो।

000

राज्य रो निर्वाचन विभाग विशेष संक्षिप्त पुनरीक्षण पाछे मतदाता सूचियां छाप दीनी है। मुख्य निर्वाचन अधिकारी प्रवीण गुप्ता बतायो के प्रदेश मांय वोट देवण वाळां री तादाद मांय 6 लाख 96 हजार 424 री बधोतरी व्ही है। ई पाछे अब प्रदेश मांय कुल 5 करोड़ 26 लाख 80 हजार 545 मतदाता व्हे गया है। वे बतायो के नुवी मतदाता सूची निर्वाचन विभाग री वेबसाइट माथे मौजूद है। वे बतायो के ई दफा चुनाव मांय बुजुर्ग, दिव्यांग अर बीमार मतदातावां ने घर ऊं वोट देवण रो सुबीतो दियो जावेला।

000

जयपुर मांय आज गुड गवर्नेस रा बारा मांय दो दिन रो क्षेत्रीय सम्मेलन सरू व्ह्यो। इण रा उद्घाटन जळसा मांय केंद्रीय कार्मिक, लोक शिकायत अर पेंशन राज्य मंत्री जितेंद्र सिंह कह्यो के लोक सेवकां ने लोगां री जिन्दगी मांय बदलाव लावण रा तरीकां माथे खास ध्यान देवणो चाहिजे। जितेन्द्र सिंह कह्यो के ई तकनीक काम लेवण ऊं गवर्नेस मांय ई साफगोई बधी है।

सम्मेलन रा उद्घाटन पाछे खबरनवीसां सागे बातचीत करता थकां वे कह्यो के प्रधानमंत्री नरेंद्र मोदी री अगुवाई मांय केंद्र सरकार काम करण री संस्कृति बदली है, जिण ऊं जनता री जिन्दगी आसान व्ही है। वे कह्यो के सरकार री ओर ऊं करी ज्या प्रशासनिक सुधार ऊं समाज माथे मोटो सकारात्मक असर पड्यो है।

000

केंद्रीय प्रशासनिक सुधार अर लोक शिकायत विभाग री ओर ऊं राखी ज्यो ओ 25 वों क्षेत्रीय सम्मेलन है। पुरस्कार जीतण वाळा प्रशासनिक अहलकार ई सम्मेलन मांय वां रा अनुभव बतावे है।

000

दौसा मांय आज 20 बुनकरां ने अंबर चरखा मुफ्त बांटी ज्या। आं चरखां रो मोल 20 ऊं 25 हजार रुप्या ताई है। आं अम्बर चरखां ऊं एके सागे 8 सूत कात्या जा सकेला। ई मौके खादी अर ग्रामोद्योग बोर्ड रा अध्यक्ष बृजकिशोर शर्मा कह्यो के दौसा मांय तिरंगो झंडो सिलबा रो कपडो बणायो जावे है पण इण ने प्रोसेसिंग सारू कर्नाटक रा हुबली भेज्यो जावे है, ई कारण साल 2025 ताई दौसा मांय ही तिरंगा झंडा री प्रोसेसिंग यूनिट लगावण री कोशिश करी जावेला।

000

शाहपुरा मांय क्रांतिकारी बारहठ बंधुआं रा पैनोरमा बणावण सारू आज भूमि पूजन करी ज्यो। बारहठ पैनोरमा बणावण ऊं नुवी पीढी केसरीसिंह, जोरावर सिंह अर प्रतापसिंह बारहठ री आज्ञादी री लड़ाई मांय भागीदारी अर वां रा इतिहास री जाणकारी कर सकेला। राज्य सरकार री ओर ऊं राजस्थान धरोहर संरक्षण अर प्रोन्नति प्राधिकरण रा तैत 4 करोड़ रुप्या रा खर्च ऊं ओ पैनोरमा बणायो जावेला। भूमि पूजन रे मौके राजस्व मंत्री रामलाल जाट ई मौजूद हा।

000

केंद्रीय संचार ब्यूरो री ओर ऊं आज सवाईमाधोपुर जिला रा सुनारी गांव मांय स्वच्छता ही सेवा अर कचरा मुक्त भारत मुद्दा माथे न्यारा-न्यारा कार्यक्रम राख्यी ज्या। कार्यक्रम मांय ब्यूरो री ओर ऊं केंद्र सरकार कानी ऊं चलायी जा रही जनता री भला री न्यारी-न्यारी योजनावां री जाणकारी दीरीजी। संगोष्ठी मांय स्वच्छता ही सेवा रा महत्त्व माथे विचार बतायी ज्या। ई दौरान साफ सफाई अर कचरा मुक्त भारत री शपथ दिरायी ज्यी।